

Perdana Menteri harap Tahun Harimau bawa kemakmuran, kesejahteraan

Februari 1, 2022

KUALA LUMPUR: Tahun Harimau sempena sambutan Tahun Baharu Cina kali ini diharapkan terus mengeratkan hubungan antara kaum di negara ini, selain membawa kemakmuran dan kesejahteraan kepada Keluarga Malaysia, kata Perdana Menteri, Datuk Seri Ismail Sabri Yaakob.

"Bukan sekadar masyarakat Cina, perayaan ini turut disambut oleh semua bangsa di negara ini. Ini melambangkan perpaduan kita, selaras dengan semangat Keluarga Malaysia," katanya kepada pemberita selepas menghadiri Majlis Sambutan Tahun Baharu Cina anjuran MCA di Wisma MCA, di sini hari ini.

Beliau yang tiba kira-kira jam 9.30 pagi dengan kemeja berwarna merah dan diiringi isteri, Datin Seri Muhaini Zainal Abidin, disambut Presiden MCA yang juga Menteri Pengangkutan, Datuk Seri Dr Wee Ka Siong.

Ismail Sabri kemudian menyertai barisan kepimpinan MCA untuk bersama-sama menggaul 'Yee Sang' di awal majlis itu.

Turut hadir, barisan menteri Kabinet, antaranya Menteri Kanan Perdagangan Antarabangsa dan Industri, Datuk Seri Mohamed Azmin Ali serta Menteri Kanan Pertahanan, Datuk Seri Hishammuddin Tun Hussein, selain bekas Perdana Menteri, Datuk Seri Najib Razak dan Presiden UMNO, Datuk Seri Dr Ahmad Zahid Hamidi.

Majlis diadakan mengikut prosedur operasi standard (SOP) dan terhad kepada 300 tetamu jemputan, berbanding kapasiti Dewan San Choon yang boleh memuatkan sehingga 1,500 orang.

Sambutan itu turut disiarkan secara langsung di laman Facebook MCA dan dimeriahkan dengan tarian singa, persembahan kebudayaan serta nyanyian. - BERNAMA



Perdana Menteri, Datuk Seri Ismail Sabri Yaakob disambut Presiden MCA, Datuk Seri Dr Wee Ka Siong ketika hadir pada sambutan Tahun Baharu Cina di Wisma MCA. - NSTP/Fathil Asri